



## Sharti Tumwamini Yeye

**B**inti, imani yako imekuponya; enenda zako na amani. —Luka 8:48.

Akiwa njiani kwenda nyumbani kwa kiongozi; katika umati wa watu, Yesu alikutana na mwanamke wa kuhurumiwa ambaye kwa miaka 12 alikuwa akisumbuliwa na ugonjwa uliofanya maisha yake kuwa mzigo. Alitumia mali yake yote kwa madaktari na tiba, lakini alitamkiwa kuwa ugonjwa wake hauwezi kutibiwa. Lakini matumaini yake yaliweza kuimarika aliposikia kuhusu miujiza aliyofanya Kristo. Alijua kuwa ikiwa angeweza kumfikia, angeponywa.... Alikuwa karibu kukata tamaa, wakati alipokuwa akipita katikati ya umati, akafika karibu na mahali alipokuwa.

Fursa adhimu ilikuwa imewadia. Alikuwa mbele ya Tabibu Mkuu! Lakini kati ya machafuko, hakuweza kuzungumza naye, wala kuona zaidi ya mwonekano wa umbo lake akipita. Kwa hofu ya kupoteza nafasi yake ya pekee ya kupata nafuu, alijikaza, akijisemea, “Ikiwa tu nitaweza kugusa mavazi yake, nitapona.” Bwana Yesu alipokuwa akipita, alisonga mbele, na aliweza kugusa pindo la vazi Lake. Lakini katika muda huo huo aliweza kujua kuwa alikuwa ameponywa. Katika mguso huo mmoja kulikuwa na imani ya maisha yake, na mara moja maumivu na udhaifu wake vilipisha nafasi kwa nguvu za afya kamili...

Ghafla Yesu akasimama, na watu wakasimama naye. Aligeuka, na akatazama huku na huko akauliza kwa sauti inayosikika juu ya machafuko ya umati, “Ni nani aliyenigusa”? ... Mwokozi aliweza kutofautisha mguso wa imani kutoka kwa mguso wa kawaida wa umati usiojali. Imani hiyo haikupaswa kupuuziwa bila kutajwa. Alitaka kusema maneno ya faraja kwa mwanamke mnyenyekevu ambayo yangukuwa chanzo cha furaha kwake—maneno ambayo yangukuwa baraka kwa wafuasi wake hadi mwisho wa nyakati....

Yesu alisisitiza kujua nani alimgusa. Alipogundua kuwa kujificha kusingelela faida, alijitokeza kwa kutetemeka, na kujitupa miguuni pake. Kwa machozi ya shukrani alielezea hadithi ya mateso yake, na jinsi alivyopata nafuu. Yesu kwa upole alisema, “Binti, imani yako imekuponya; enenda zako na amani”.... Haikuwa kwa kugusa kwake tu, bali kwa imani iliyoshika nguvu Zake za kiungu ndipo uponyaji ulipotokea....

Haitoshi kuamini kuhusu Kristo; tunapaswa kumwamini Yeye. Imani pekee itakayotukoa ni ile inayomchukua kama Mwokozi wa kibinafsi; inayotambua stahiki Zake kwetu wenyewe. Wengi wanashikilia imani kama maoni. Imani inayookoa ni mapatano kama ya kibiashara ambapo wale wanaompokea Kristo wanaungana na Mungu kwa uhusiano wa kiagano. Imani ya kweli ni maisha. Imani iliyo hai inamaanisha ongezeko la nguvu, imani ya kujiamini, ambayo kwa hiyo, nafsi inakuwa nguvu inayoshinda (The Desire of Ages, 343, 347).